

Nunatta pissarititaanik qimminut uumasuutinullu allanut nerisassianik, pisortanit namminersortunillu pigineqataaffiusumik tunisassiorneq, imminut akilersinnaasumik ingerlanneqarsinnaanersoq paasinialugu, Naalakkersuisut Upernaakkut Ataatsimiinnermi 2017-mi agguaassassamik nalunaarusiornissaannik peqquneqarnissaannik Inatsisartut aalajangiiffigisassaattut siunnersuut. (UPA 2016/40)
(Inatsisartunut ilaasortaq Peter Olsen, Inuit Ataqtigiit)

Qimminut nerukkaatissiorfimmik nunatsinni pilersitsisoqarsinnaaneranut iluaqutissartai ajoqutissartaalu pillugit Naalakkersuisut UPA2017-imut nalunaarusiamik suliniuteqaqqullugit inatsisartut aalajangiiffigisassaattut siunnersuut. Tamatumani aningaasaqarnikkut piumasagaatinnngortussat tunisassiornissamullu tunngasut ilanngullugit. (UPA 2016/141)
(Inatsisartunut ilaasortaq Anthon Frederiksen, Partii Naleraq)

Akissuteqaat

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq)
Siullermeerneqarnera

Naalakkersuisut Peter Olsen-ip Inuit Ataqtigiinnersup aamma Anthon Frederiksen-ip Partii Nalerameersup siunnersuutaanut qujassutigaat.
Naalakkersuisut siunnersuutit pissanganartippaat, isumalluutitsinnillu pitsaanerumik atuisinnaanitsinnut assersuutitsialaasutut isigalugit.

Najukkami suliffissaqartitsinermik aningaasatigullu kaaviiartitsinermik qularnaarisunik inuussutissarsiornermi sulianik ineriartortitsuarneq Naalakkersuisut assut alaatsinaataaraat. Naalakkersuisut aallaavittut namminersortut inuussutissarsiornikkut suliniutaat tapersorsorniarpaat – tamannalu ilaatigut Greenland Business’imit aquneqartunik inuussutissarsiornermi siuarsaanermut aqqissuussinerit aqqutigalugit pisarpoq.

Piujuaannartitsinermut tunngavigisat pitsaanerpaat malillugit isumalluutitta atornissaat, aammalu ilaatigut aalisakkat erlaviinik, tingunnik, amernik, saanernik niaqqunillu igittakkat annikillissarnissaat pingaartuupput. Qimminut nerukkaatit uumasuutinullu allanut nerisassiat saniatigut aamma isumalluutit taakkorpiaat atorlugit pinnersaasiornermi aamma inuussutissanik nioqqutissiornermi tamakkua iluaqutigineqarsinnaapput. Taamatut tunisassiorneq aningaasaqarnikkut siuarsaanermik inuussutissarsiorfinnilu nutaani suliffeqartitsinermik tunngavissiisinnaalluni.

Naalakkersuisut nuannaarutigalugu Inatsisartunut nalunaarutigisinnaavaat, Neqi A/S nunatsinni tunisassiassanik qimminut nerukkaasiortalernissamik suliniuteqarmat. Neqi A/S nerukkaasiortalernissaminut suliniummini siuarsimasorujussuuvoq, Fødevarestyrelse-miillu maanna oqaloqateqarluni attaveqatigiittoqarluni, Neqi A/S -ilu taakkunanit ilisimatinneqarpoq Kalaallit Nunaanni uumasuutinut nerukkaasiortarnissamat tunisassiarineqartartussanullu piumasagaatissat maanna suliarineqaleruttormata. Tamatumalu kingorna uumasut nakorsaqaqarnermut oqartussaasup Neqi A/S-imut akuersissuteqarluni suliaqartoqassaaq. Neqi A/S akuerineqareerpat savaaqqanit perlukut qerisut 40 tonsit pigineqartut

suliarineqarsinnaasut Neqi A/S-imit ilisimatitsissutigineqarpoq,
suliareqqinneqarsinnaalissapput tunisassiarineqarlutillu.

Naalackersuisut UPA 2017-imi Inatsisartunut saqqummiussissapput nunatsinnut tamarmut qimminut nerukkaatissanik nioqqutissiornerup periarfissai eqqarsaatigalugit. Neqi A/S-ip taamanikkussamut misilittagarilersimasassai nassuiaasiami ilanngunneqarumaarput. Taamaattumik Naalackersuisut inassutigaat immikkoortup 141-up akuersissutigineqarnissaa, immikkoortorli 40 Namminersorlutik Oqartussat suliffeqarfiisa piffissami matumani suliamik ingerlatsilereersimanerat tunngavigalugu itigartinneqassasoq inassutigineqassalluni.